

KALINAW



“Kon nasayud ka pa unta karong adlaw kon unsa ang gikinahanglan alang sa kalinaw!” — Lukas 19:42.

Sa diha nga molantaw kita sa atong palibut ug makakita sa mga butang nga nagpanghitabu sa kalibutan karon, daw labing matin-aw alang kanatong tanan nga walay kalinaw sa kalibutan. Bisan diin makadungog ikaw sa panagaway, pagpatay, mga gubat ug mga dinongog dongog sa mga gubat. Bisan unsa nga pamantala-an nga imong maablihan ug basahon, imong makita diha ang makalilisang mga butang nga gibuhat sa mga katawhan sa matag usa tungod sa sala, pagdumot ug kasina. Ang mga dagkung tawo sa kalibutan nagasulay sulod sa daghang mga katuigan karon sa pagpahamtang sa kalinaw sa kalibutan, ug walay usa kanila ang nagmalampuson. Dili lang kay ang kalibutan niini nga kahimtang, apan makasusubu uyamot ang pagingon nga daghan sa atong mga pinuayan wala usab makabaton sa kalinaw sulod nila. Labaw sa tanan, mao ang kamatuoran nga adunay labing daghan sa mga katawhan sa kalibutan karon, kinsa walay kalinaw sa ilang kaugalingon kalag ug ania denhi ang gamut sa tanang mga kasamok magumikan.

NGANO MAN NGA WALAY KALINAW?

Sa sinugdan ang Dios nagbuhat sa kalibutan ingon man sa mga sagbut, kabulakan, mga kakahoyan ug ang tanang mga mananap nga nagpuyo

ilalum sa tubig ingon man sa nagakinabuhi sa mamala nga yuta. Gibuhat usab sa Dios si Adan ug si Eva ug niining tibook nga kabuhatan didtoy kalinaw. Si Adan ug si Eva wala mahadlok sa bisan unsa sa mga mananap, ug ang mga mananap, sa ilang taliwala, nagkinabuhi nga malinawon ug malipayon. Ang karnero makalakaw sunod sa lion ug ang lion dili magdagmal niini. Labaw sa tanan dihay kalinaw taliwala sa Dios ug sa tawo, ug nabatasan sa Dios ang pagdangat sa kabugnaw sa kagabhion ug maglakaw ug makigsulti uban kang Adan ug Eva. Wala silay kahadlok sa ilang mga kasingkasing ngadto sa Dios ug nagahandum kanunay sa Iyang pagbalik aron magpakiguban ug makigambitay uban kanila.

Unya si Satanas, ang kaaway sa kalinaw, misulod ngadto sa bitin ug misulay kang Adan ug Eva aron makasala, tungod kay diin anaa ang sala walay kalinaw. Si Satanas, ang amahan sa kabakakan, misulti kanila nga dili sila mamatay bisan ug supakon nila ang Dios ug mikuha sa bunga nga gidili kanila sa Dios sa pagkaon. Ingon sa daghang mga tawo karon, sa gihapon, magapatalinghug sa tingog sa yawa, sa ingon si Adan ug Eva misanong ug mituo sa gitintal kanila ni Satanas ug nakasala sila batok sa Dios. Niadto dayong tungura, ang kalinaw nga ilang gipahimuslan, nawala kanila-ang tanan sa kalinaw ug katahum nga gibuhat sa Dios nadaut sa usa lamang ka buhat sa pagpakasala, ug ang kahadlok misulod sa mga kasingkasing ni Adan ug Eva.

Niadtong gabhiuna sa paghiabut sa Dios sumala sa naandan aron sa pagpakigsulti kanila, mitago sila ug nahadlok sa Dios. "Nakasulod sa kalibutan ang sala pinaagi sa usa ka tawo, ug ang sala nagdalag kamatayon" ug bisan kita nga mga buhi karon "nakasala ug nawad-an sa himaya sa Dios" (Rom. 5:12; 3:23). Ang usa ka sala mihatud ngadto sa lain, ug karon ang tibook kalibutan nagilaid sa sakit sa sala, ug busa ang kalinaw wala na maghari niini nga yuta.

ANG DIOS NAGHANDUM SA PAGPABALIK SA KALINAW SA KALIBUTAN

Mitan-aw ang Dios gikan sa langit ug nakita ang tanang pagdumot, kahadlok, sala ug ang mga kasub-anan, ug sa kadaku sa Iyang gugma gipadala Niya ang Iyang bugtong Anak aron sa pagpakatawo sa pasungan. Matag tuig sa panahon sa Pasko, ginapahinumduman kita sa mga pulong sa manulonda, "Ayaw kamo kahadlok, kay ania ako nagdalag maayong balita alang kaninyo nga makalipay pagayo sa tanang katawhan. Kay karong gabhiuna, natawo sa iungsod ni David ang inyong Manluluwas, ang Cristo nga Ginoo! Ug sa kalit mitungha uban usab sa anghel ang usa ka dakung panon sa mga anghel sa langit nga nagawit ug mga pagdayeg sa Dios: "Dalaygon ang Dios sa kahitas-an, ug sa yuta panagdait sa mga tawo nga Iyang gikahimut-an!" (Luk. 2:10-14). Si Jesus gipadala sa kalibutan aron "sa pagbanwag sa tanang nagpuyo sa kangitngit nga landong sa kamatayon, pagagak sa atong mga lakang ngadto sa dalan sa kalinaw," (Luk. 1:79). Ang Efeso 2:14 nagsulti usab kanato nga "Siya ang atong kalinaw". Gipadala sa Dios ang Principe sa Kalinaw niini nga kalibutan ug kon ang mga katawhan niadtong mga adlawwa midawat pa lamang sa Principe sa Kalinaw makahimo unta sila sa pagpuyo sa panagangay pagusab.

UNSA ANG GIHIMO SA MGA TAWO NIADTONG KALINAW?

Sama kang Adan ug Eva, ang mga Judio ug mga dili Judio ug ang

mga katawhan niadtong panahona, mipalabon sa pagsupak sa Dios ug sa pagsunod sa tambag ni Satanás. Ilang gisalikway ang Principe, ug sa gibutang na ni Pilato si Jesus ug Barabbas sa atubangan nila, missing-git sila, "Dili siya-si Jesus! Si Barabbas maoy among gusto!" Sa laing pagkasulti, nagingon sila, "Kuha-a ang Principe sa Pakigdait ug bugti niini hatagi kami sa pagdumot, mga gubat, mga pagpatay ug sala." Kining mga tawhana may kaugalingon nilang kabubut-on ug mahimo untang ilang pilion alang kanila ug sa walay pagpugos sa ingon, apan bisan pa ilang gipili si Barabbas. Ang mga adlaw diin kita nagakinabuhi sa hingpit managsama. Ang Dios naghatag kanato sa usa ka pag pili. Mahimong maangkon nato si Ginoong Jesus ingon nga atong Manluluwas ug ingon nga atong Hari, ug magdala Syag pakigdait o kalinaw sa atong kinabuhi. Miingon Sya, "Ang kalinaw ibilin Ko kaninyo, Akong kalinaw ihatag Ko kaninyo; kalinaw nga dili ingon sa ikahatag sa kalibutan, ayaw kamog kabalaka ug ayaw kahadlok" (Juan 14:27). Ang mga sala sa atong mga kinabuhi nagpahilayo kanato gikan sa Dios, ug sa atong kahimtang nga makasasala wala kitay kalinaw sa sulod nato, apan si Ginoong Jesus sa kanunay nagbarug uban sa bukas nga mga bukton nagpaabut sa pagdawat kanato balik ngadto sa panon ug sa pagpasiguli kanato, aron sa paghinlo kanato pinaagi sa Iyang Dugo, sa paghatag kanatog gahum aron mahimong mga anak sa Dios ug sa paghatag kanato sa KALINAW.

Gisultihan kita sa mga taga Roma 5:1 "Sanglit gihimo na man kitang matarung sa Dios pinaagi sa pagtuo, may panagdait na kita ug ang Dios pinaagi sa atong Ginoong Jesu-Cristo." Walay butang niining kalibutan nga makahatag kanato sa kalinaw. Salapi, kadatu ug ang kadunganan dili makahatag niini; ang inum dili makahatag niini; ug ang pagpalista sa atong ngalan sa listahan sa simbahan dili makahatag niini. Aduna lamang ing usa ka paagi sa pagdawat sa kalinaw alang sa atong mga kalag ug mao ang pagduol sa Ginoong Jesus, magsugid sa atong mga sala sa Iyang atubangan ug magbasul niini, ug "Siya matinumanon ug matarung sa pagpasaylo kanato sa atong mga sala ug sa paghinlo kanato gikan sa tanang pagka dili matarung." Ang kalinaw nga gihatag ni Jesus maoy usa ka kalinaw nga nagalabaw sa tanang pagsabut (Fil. 4:7). Dili kini ikagsaysay sa tawo, apan atong masinate kini sa atong mga kinabuhi kon buot kita sa pagbiya sa kalibutan ug sa mga butang niini, sa pagbiya sa sala ug sa mga higalang makasasala, ug sa pagbalik ngadto sa Ginoong Jesu-Cristo sa pagalagad Kaniya lamang. Makahimo tingali kita sa pagkinabuhi sa walay kalinaw apan dili kita makahimo sa pagpakamatay nga walay kalinaw, "kay ang gingharian sa Dios dili kalan-on ug ilimnon kondili pagkamatarung ug kalinaw" (Rom. 14:17). Busa kon, wala kitay kalinaw sa Dios sa atong mga kasingkasing sa takna sa atong kamatayon, sa pagkatinuod dili kita madawat ngadto sa Iyang langit sa kalinaw.

Kon wala pa kita makadawat sa Principe sa Kalinaw sa atong mga kinabuhi ug mamatay kita sa atong masal-anon nga kahimtang, unya aduna lamang ing usa ka dapit alang kanato, ug mao kana ang mga kalayo sa mga kapanahonan sa impierno. Dili ikaw makahimo sa pagpakamatay sa kahimtang diin anaa ikaw karon tungod kay hisilotan sa mga kapanahonan, ug ang Pulong sa Dios nagsulti kanato nga ang "aso sa pagsakit kanila magautbo sa mga kapanahonan sa mga kapanahonan." Usa ka impierno sa mga kapanahonan sa mga kapanahonan diin moadto ang makasasala, ug kitang tanan nanagpakasala. "Walay usa nga matarung, wala, walay usa." Busa kon buot ka moadto sa langit, aduna lay usa ka butang ang angay himoon ug mao ang pagbaton ug kalinaw uban sa Dios ug ipahiluna kini

sa imong kasingkasing "Paharia sa inyong kasingkasing ang kalinaw nga gikan sa Dios." (Col. 3:15). Sa panahon sa Pasko mapahinumdoman kita sa paganhi ni Ginoong Jesus sa kalibutan aron sa pagdala sa kalinaw. Sa panahon sa kuarisma gipahinumdoman kita giunsa sa mga katawhan ang pagsalikway Kaniya ug milangsang Kaniya sa krus. Minahal nga higala, imo ba usab himoon nga usa ikaw kanila nga nagsalikway sa Agalon, o imo bang ablihan ang imong kinabuhi ug pasudlon Siya? Aduna lamang ing usa ka paagi sa pagpasulod sa kalinaw sa Dios sa imong kasingkasing, ug mao kana ang pagluhod sa Iyang atubangan karon, nga magsugid Kaniya nga ikaw usa ka makasasala, ug maghangyo kaniya sa paghinlo ug paghugas kanimo sa Iyang mahal nga Dugo ug magangkon kanimo nga Iya na gayud; bisan pag unsa nimo ka maayo sa imong pagsabut, kinahanglan nga ikaw maluwas; bisan pag unsa ka dautan ikaw sa imong paghunahuna, Sya andam ug buot modawat kanimo ug dili gayud mosalikway kang bisan kinsa. Kon wala pa ikaw makasinate sa kalinaw sa Dios sulod sa imong kalag, dawata kini karon ug makabaton ka sa kalipay nga dili ikagasoy ug napuno sa himaya.

Sa usa ka servisyo sa Maayong Balita usa ka tigulang nga tawo mitindog ug misulti, "Nagkinabuhi ako sulod sa paghari sa upat ka mga hari. Sa una kanunay kami nagkagubat, ug hilabihan ka makalilisang kadto nga panahon. Sulod sa paghari sa ikaduha giabutan kami ug gutom nga daku, unya nanga-on kamig mga ilaga ug sagbut ug mga kahoy. Sa ikatulo, gidaug kami sa among mga kaaway ug nahimo kaming sulogoon nila. Apan sulod sa paghari ning ikatulo ka hari giduaw kamig lain nga Hari, usa ka maayo nga Hari, makigdaiton ug Hari sa Gugma — si Jesus ang Ginoo gikan sa langit! Nakadaug na Sya karon. Gidaug Niya ang among mga kasingkasing. Busa nagkinabuhi na kami sa kalinaw ug kadagaya, ug naglaum sa dili madugay magpuyo uban Kaniya sa langit."

Minahal nga higala, itugyan ang imong kinabuhi kang Jesus karon. Hunong na karon sa imong dalan usus ngadto sa impierno, balik ug alagara ang Hari sa mga Hari ug Ginoo sa mga Ginoo. Imong makita nga daghan sa imong mga higala mobiya kanimo, apan hi numdumi nga si Jesus nagingon, "Ania karon Ako uban kaninyo kanunay, hangtud sa katapusan sa kapanahonan." Ug sa katapusan, "Paharia ang kalinaw sa Dios diha sa inyong mga kasingkasing." (Col. 3:15).

M.R. Gschwend

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

For free Gospel literature, books and tracts in over 540 languages, write to:

E-MAIL: info@angp.co.za

ALL NATIONS GOSPEL PUBLISHERS

P.O. Box 2191, PRETORIA, 0001, R.S.A.

(A Gospel Literature Mission financed by donations)

(Reg. No. 1961/001798/08)